

# 2 TIMOTI

## One Towe To'uresi eite Pol lai Timoti ma'e Lese Ausawi

### 2 Timoti Peri Tutawe

Pol, Rom lo kalabus wesi sahe iroteye ape, one towe eite meni Timoti ma'e lese ausawi. Pol, Timoti aiwawe a'i lu taune ma'e au te'e fiyariteye. Sosu Pol omo Efesus ma'e lu taune au noweinoweiyeyi ne eimawesawi. Pol apou toteye, "Rom lo ai atu siye lu tamo le ane aine tera'eyeyi ne ataheyeye." Serai le Timoti lo tote tawesiyeyi au kairefiyeyeyi ne totesiya. Le Timoti ma'e peri ta eitoweriye. Le witane a'i le ma'e sewiyeyeyi ne aiyeyeyi. Le aiyerowa su, le Pol lo ipari tahe mase aitairowa. Pol kalabus wesi sahe tahe lo naretei a'i teriteteye.

---

**1** <sup>1</sup>Owane Sitewi lai ane Pol, marepi lo se Owane Sitewi lo peri au te'eyeyi ne ariariyeyeyi. Sosu le ane lu taune ma'e eimawesawi. Le a'i lai ane lu taune werese ma'e Owane Sitewi lo peri au te'eyeyi ne eimawesawi. Lowe Krai Jisas lo peri wanu umasiyeyi su, Owane Sitewi lai lowe ma'e marepi hepene he'i a'i aurowa.

<sup>2</sup>Ane lai meni Timoti ma'e, meni eime wisere a'i ano, one towe eite ausawiyeyi. Owane Sitewi lai ne ma'e marepi wisere a'i, sosu ferafereiyeyi erasi a'i, sosu marepi fetane a'i auwei. Etiri ape mo Owane Sitewi, Tai nomo lo ma'e sosu Krai Jisas Meni Owane nomo lo aiwawe lowesi ma'e fai.<sup>a</sup>

### Nomo Owane Sitewi ma'e au te'e wisereyeyiya.

<sup>3</sup>Ane Owane Sitewi ma'e au te'e tiyatiyeyi su, ane ne ne le ma'e ei towerinamisiya. Mi mi pasi pasi ane ne ne Owane Sitewi ma'e au te'enamisiya. Ane ne ne Owane Sitewi ma'e au te'e wisereyenamisiya. Ya'ariyeyi lu feni ano le ma'e au te'e wisereye nine'inamiteye. Ane aiwawe

---

<sup>a</sup> 1:2 Ap 16:11; 1 Ti 1:2

a'i le ma'e wiyawi lo ta'anenamisiya. Ane le ma'e wiyawi lo ta'anesiya su, ane yo seni farere a'i ironamisiya.<sup>b</sup> <sup>4</sup>Ne lai ane ne luwei erasi irowe su, ane luwei no tote tawesinamiteye. Marepi ano aiwawe a'i luwei erasi irosiya. Ane nihari no siyereme. Ane ne ma'e sewiyeyei ne aiyerowa su, marepi ano erasi a'i tote wisereye nine'irowa. <sup>5</sup>Ne Owane Sitewi ne tote tawesi umasinamiteye. Tote tawesiyei no wiyeme pefine a'i ne. Tu naifa mai tape no, iyape Lois, tu Owane Sitewi ne tote tawesi umasiteye. Sosu nowe mo'o mai no, iyape Yunis, aiwawe a'i Owane Sitewi ne tote tawesiteye. Lowesi le ne erasi pefine a'i tote tawesiteye. Sosu ane etiri ta so'oruwesiya. Ne aiwawe tote tawesiyei lowesi lo aiwawe a'i ironamisiya.<sup>c</sup> <sup>6</sup>Serai ane ne ma'e au te'esiya. Owane Sitewi lai Hepene Wara'i a'i lo ne ma'e neri a'i auwe. Ne lai Owane Sitewi lo Hepene Wara'i a'i marepi no erasi a'i heneraire. Ane ereti ano ne ma'e isawe hetesiye su, Owane Sitewi lai Hepene Wara'i a'i lo ne ma'e auwe.<sup>d</sup> <sup>7</sup>Sosu Owane Sitewi lai marepi taweiru a'i au ta'ame. Ahowa, le marepi kairefi a'i auwe. Le a'i lai ne ma'e ferafereiyei ewiteyei lo marepi auwe. Sosu aiwawe le a'i lai ne ma'e marepi wara'i a'i auwe.<sup>e</sup>

<sup>8</sup>Serai ne lu taune ma'e Meni Owane nomo lo ne au te'e fiyariyei su, ne marepi neritase a'i owe ape teritete. Ane Kraisi lo peri au te'eteye su, lu taune lai ane kalabus wesi sahe ani fu arosawi. Serai ne ane ne owe ape neritaseyere. Ahowa! Sosu notosi Kraisi Jisas lo peri heneruwe au te'eyei su, lu tamo notosi ma'e au luwaruwerowa, sosu notosi fofowei erasi teriterowa. Owane Sitewi lo kairefi se notosi kairefi a'i ironamiyei. Serai ne etiri ape ne owe ape neritaseyete. <sup>9</sup>Sosu Owane Sitewi nomo lo a'i lai yo seni luwaru a'i towafi nomo lo au sasari ani pamoweyewe, sosu le nomo yo seni aseparo se irowei ne ariariyeye. Nomo werese lai yo seni luwaru a'i towafi nomo lo au ani sasari pamowerowata. Ahowa! Owane Sitewi lai nomo ne tote ferafereiyewe, sosu marepi lo nomo ma'e yo seni luwaru a'i au ani sasari pamoweye. Tu naifa weriyei Owane Sitewi lo ferafereiyei ape, le a'i lai Kraisi Jisas lo kairefi se nomo ma'e auwe.<sup>f</sup> <sup>10</sup>Serai Kraisi Jisas yo seni luwaru werese a'i nomo lo au ani sasari pamoweye ape, hi awei ma'e itorai su, le a'i lai Owane Sitewi lo ferafereiyei erasi nomo ma'e au atuatuwe. Le a'i lai temeniyeyei lo kairefi hi ani ararosawi. Le a'i lai marepi hepene he'i a'i peri heneruwe lo se au te'e atuatuwewe, sosu nomo mi mi pasi pasi weriyei ironamitorowa.<sup>g</sup>

<sup>11</sup>Peri heneruwe wisere a'i ne Owane Sitewi lai ane au te'e siye meni ariariyeye. Sosu le a'i lai ane Owane Sitewi lo peri lu taune ma'e au te'e fiyariyei ne eimawesawi. Aiwawe a'i le lai ane Owane Sitewi lo peri au te'e atuatu siye meni ariariyeye.<sup>h</sup> <sup>12</sup>Sosu Owane Sitewi lai ane ariariyeye

<sup>b</sup> 1:3 Ap 23:1    <sup>c</sup> 1:5 Ap 16:1    <sup>d</sup> 1:6 1 Ti 4:14    <sup>e</sup> 1:7 Ro 8:15    <sup>f</sup> 1:9 Ef 2:8-9; Ta 3:5  
<sup>g</sup> 1:10 Hi 2:14    <sup>h</sup> 1:11 1 Ti 2:7

su, serai lu tamo ane ma'e au luwaruwesiya. Ahowa! Ane neritaseyeyei se ta'ama. Wiyeme, ane le ne so'oruwesiya! Ane marepi lo umasinamisiya. Nowe weriyei weriyei se, Owane Sitewi lai peri farere a'i lo le ane ma'e auwe ape, le etiri ape au noweinoweinamiyei. <sup>13</sup>Peri ano wanure! Owane Sitewi lo peri farere a'i ape, ane ne ma'e au te'eye ape, ne marepi no papu tote tawesire. Peri wisere a'i apou ape ne peri ape umasite, sosu lu taune ma'e au te'e atuutate. Ne lu taune ma'e Owane Sitewi lo peri au te'eyei su, Krai Jisas lo kairefi se, lu taune werese ne marepi erasi a'i tote wawesiyete. Sosu aiwawe ne Krai Jisas lo marepi tote tawesire. Sosu lu taune ma'e au te'e fiyarite. <sup>14</sup>Owane Sitewi lo peri wiyeme a'i ape, le lai ne ma'e auwe ape, ne etiri ape mo au noweinoweinamite. Owane Sitewi lo Hepene Wara'i a'i nomo werese lo marepi papu irosiya ape, ne Owane Sitewi lo peri wiyeme a'i au noweinoweinamite.<sup>i</sup>

<sup>15</sup>Ne etiri ape so'oruwesiya awere? Lu taune werese omo pani Asia sahe lowe ane ne me'iyeni ma'e arunatiyewe fi. Meni Figelus, sosu Hermogenes, lowesi aiwawe ane ne me'iyeni ma'e arunatiyewe fi.

<sup>16</sup>Ahowa, meni tere'e ane ne au noweinoweisiya. Meni iyape Onesiforus, ane Owane Sitewi ma'e le ne apou ei towerisiya, "Owane Sitewi, ne meni ape, awaripi lo aiwawe, ferafereiyei erasi no lowe ma'e ironamite." Ane kalabus wesi sahe irosiya su, le ane ne neritaseye ta'ame. Sosu le marepi ano au kairefiyete. <sup>17</sup>Sosu le omo Rom iroteye su, le ane ne siye nehi tohotete. Sosu mo'o le nihari ano siyeye. <sup>18</sup>Meni ape omo Efesus sahe ane ma'e etiri tomu ne'ese ani pati aniye. Nowe ye'ewi se, Meni Owane nomo lo le ma'e ferafereiyei erasi au irorowa. Ne etiri apou a'i so'oruwesiya.

### Timoti, ne kairefi a'i teinamite!

**2** <sup>1</sup>Serai Timoti, meni eime ano, ne Krai Jisas lo ferafereiyei erasi se marepi no kairefiyete. Krai Jisas lo ferafereiyei nomo ma'e ironamisiya. <sup>2</sup>Peri ano ape, ane ne ma'e au te'eye ape, lu taune tomu ne'ese peri ano aiwawe a'i wanuwe. Peri ano ne, ne lu tamo ma'e, Owane Sitewi lo peri wiyeme a'i umasinamisiya ape, ne lowe ma'e peri ano au te'ere. Sosu lowe fara'u lu taune wara'i a'i tere'e tere'e apou a'i au te'e atuaturowa.

<sup>3</sup>Lu taune ne ma'e au luwaruwayei su, ne kairefi a'i teinamite. Apou a'i Krai Jisas lo ai lu kairefi aiwawe a'i kairefi a'i teinamisiya.<sup>j</sup> <sup>4</sup>Wiyeme a'i. Ai lu tamo ai atu tiyatiyeyei su, lowe omo sitewi lo etiri tote etirowata. Ahowa! Lowe meni owane lowe lo ne au tote wisereyeyei. <sup>5</sup>Lu tamo yaru ma'e iteroti. Meni ta'i tutawe yaru ma'e itero heneriyeyei totesiya su, le iterowei lo yo seni fu umasire. Sosu meni ape iterowei lo yo seni arisiyeyei

<sup>i</sup> 1:14 1 Ti 6:20    <sup>j</sup> 2:3 2 Ti 1:8

su, le etiri tutawe anirowata.<sup>k</sup> <sup>6</sup>Sosu aiwawe a'i meni ta ta'aneyei awei lo ta'ane tohoteyei su, le a'i lai tu ta'aneyei awei one, sawi me so ta'uwe ani lototorowa. Meni ape one, sawi, me so, ani tepa'asiyei su, lu taune tere'le tamo fara'u tewi a'i aniyei.<sup>l</sup> <sup>7</sup>Sosu ne peri ano ne tote etire. Ne peri ano ne toteyei su, Meni Owane Pefine a'i nomo lo etiri werese ape mo, le ne ma'e au te'le atuatu areiyeyei.

<sup>8</sup>Sosu a'i pe ne Jisas Kraiss ne tote tawesire. Le a'i lai meni owane Devit lo eime auwe kaukau weriyeyei. Sosu Jisas henerai su, lu tamo le me tape'i sahe aine tera'eye. Sosu Owane Sitewi lai Jisas si tame ta'ane norohuwe sineye. Wiyeme a'i. Peri ano ape Owane Sitewi lo peri heneruwe wisere a'i ne.<sup>m</sup> <sup>9</sup>Serai ane lu taune ma'e Owane Sitewi lo peri heneruwe wisere a'i au te'le fiyariye su, lu tamo ane ma'e au luwaruweye. Sosu lowe ane kalabus wesi ma'e henetiyewe, sosu lowe ane wafei se ti tawesiyeyei. Meni luwaru wou a'i ti tawesiyeyei. Ahowa! Lu tamo Owane Sitewi lo peri einamirowata.<sup>n</sup> <sup>10</sup>Serai lu taune tamo Owane Sitewi lo peri heneruwe wisere a'i wanu umasiyei su, ane fara'u fofowei erasi terite wisereye nine'irowa. Lowe Owane Sitewi lo peri heneruwe wanu umasiyei su, Owane Sitewi lai lowe ma'e marepi hepene he'i a'i aurowa. Marepi hepene he'i ape Kraiss sahe Owane Sitewi lo mitaiyeyei erasi mase mi mi pasi pasi weriyeyei irotorowa. <sup>11</sup>Ne peri wiyeme ape wanu etire, "Nomo Jisas aiwawe temeniyeyei su, nomo le aiwawe mi mi pasi pasi ironamitorowa."<sup>o</sup>

<sup>12</sup> "Nomo etiri orese werese a'i sahe kairefi se ironamiyei su, nowe me'iyeyei su, Owane Sitewi lai nomo lu owane aiwawe a'i au irowei. Serai nomo lu taune tamo au noweinoweiteyeyei. Sosu nomo le ne me'iyeyei ma'e atati aruwei su, le a'i lai nomo ne me'iyeyei ma'e atati arurowa."<sup>p</sup>

<sup>13</sup> Nomo peri lo arisiyei su, le nomo awera'iyenatirowata. Le topo le arearerowata."<sup>q</sup>

### Owane Sitewi lai wiyawi meni ta ariariyeyei.

<sup>14</sup>Ne peri ape lu taune ma'e au te'ete. Lowe peri yahowa'i te'le te'eyeyei su, ne lowe ma'e Owane Sitewi lo nihe se peri kairefi a'i au te'ete, "Fene peri yahowa'i eite ai peri owe ape te'ete." Lu taune tamo peri yahowa'i wanuwei su, marepi lowe lo luwaru a'i toteyei.<sup>r</sup> <sup>15</sup>Ne Owane Sitewi lo peri umasi tohotete, serai ne tahe pa'are no Owane Sitewi ma'e au heseyeyei. Ne tahe pa'are no Owane Sitewi ma'e au heseyeyei su, Owane Sitewi lai ne ne au te'le wisereyeyei. Ne wiyawi meni pefine a'i heneraiyeyei. Sosu ne Owane Sitewi lo peri neritase a'i owe ape teritete. Sosu ne Owane

<sup>k</sup> 2:5 2 Ti 4:8 <sup>l</sup> 2:6 1 Ko 9:7 <sup>m</sup> 2:8 1 Ko 15:4; Ro 1:3 <sup>n</sup> 2:9 Ef 3:1,13; Fl 1:12-14

<sup>o</sup> 2:11 2 Ko 4:11 <sup>p</sup> 2:12 Mt 10:33 <sup>q</sup> 2:13 Ro 3:3-4; Ta 1:2 <sup>r</sup> 2:14 1 Ti 6:4; Ta 3:9

Sitewi lo peri au te'eyei su, ne peri ape wiyeme a'i lu taune ma'e au te'e atuatu areiyeyei.<sup>s</sup> <sup>16</sup>Ahowa! Ne peri luwaru yahowa'i a'i owe ape te'ete. Meni ta peri yahowa'i te'eyei su, nowe i'ero a'i le Owane Sitewi lo peri wiyeme a'i awera'iyenatiyei. Sosu le meni luwaru a'i heneraiyei.<sup>t</sup> <sup>17</sup>Meni ape lu taune ma'e peri apou ape te'e au atuatuwei su, apou a'i wou enite tomu ne'ese tahe lo sahe pere'eye tapowe. Lu hesi peri apou ape apou a'i au te'e atuatuwe. Lowesi lo iyape Himeneus aiwawe Filetus.<sup>u</sup> <sup>18</sup>Lowesi Owane Sitewi lo marepi wiyeme a'i ne me'iyeni ma'e atati arunati. Lowesi peri ape wawero apou au te'eye, "Lu taune temeniye tepa'asiye ne, Owane Sitewi lai lowe werese hene ani sine tepa'asiye." Wawero tene! Lowesi peri ape au te'eye su, lowesi lu taune tamo lo marepi au luwaruweye. <sup>19</sup>Ahowa! Owane Sitewi lo marepi lo sitewi kairefi a'i irosiya. Me tou wou a'i opo teinamiteye. Marepi lo sitewi sahe Owane Sitewi lai peri ta apou leseye,

"Meni Owane wiyeme le lai lu taune werese lo siye so'oruwesiya!"

*Nam 16:5*

Sosu peri tere'e apou leseye,

"Lu taune werese Meni Owane Pefine a'i lo iyape au te'e fiyariyei su, lowe werese yo seni luwaru a'i ne me'iyeni ma'e atati arute."<sup>v</sup>

<sup>20</sup>Ipari awe tomu ne'ese wesi erasi a'i saro irosiya. Ipari awe tamo ipari tapiye wareme a'i, gol, se ta'aneye. Ipari awe tamo ipari tapiye wapo a'i se, silva, ta'aneye. Sosu ipari awe tamo me se ta'aneye, sosu ipari awe tamo peperu waru se ta'aneye. Etiri ape mo wiyawi wisere a'i se etiri tere'e tamo wiyawi luwaru a'i se. Owane Sitewi lo wesi sahe lu taune tomu ne'ese apou ape irosiya. <sup>21</sup>Serai aiwawe a'i meni ta yo seni luwaru a'i lo ani pamoweyei su, le fara'u wiyawi wisere a'i ta'aneyei. Sosu Owane Sitewi lai meni ape lo marepi wara'i a'i au irowei. Sosu meni ape ma'e Meni Owane Pefine a'i lai wiyawi lo auwei. Serai meni ape wiyawi wisere a'i apou ape fara'u ta'anerowa. <sup>22</sup>Wanure! Ne marepi luwaru a'i, yo'orei lu tamo totesiya ape, atati itero arunatite. Sosu ne marepi wara'i a'i totete. Owane Sitewi lo marepi tote tawesite. Lu taune ma'e marepi erasi a'i tote wawesiyenamite. Sosu Owane Sitewi lo marepi fetane a'i umasite. Etiri werese ape mo ne marepi kairefi a'i se umasi etite. Ne etiri ape mo umasite. Lu taune aiwawe a'i marepi wara'i a'i se Meni Owane nomo lo ma'e ei ani arowesiya.<sup>w</sup> <sup>23</sup>Sosu aiwawe a'i ne ai peri luwaru yahowa'i a'i atati arunatite. Peri apou ape ai atu tiyatisiya.<sup>x</sup> <sup>24</sup>Serai Meni Owane Pefine lo wiyawi ani siye meni ne ai peri owe ape te'e tiyatite. Ahowa! Ne lu taune werese ma'e marepi wisere a'i au irote. Ne aiwawe a'i Owane Sitewi lo yo seni werese lu taune ma'e fara'u au te'e atuatute.

<sup>s</sup> 2:15 1 Ti 4:6    <sup>t</sup> 2:16 1 Ti 4:7    <sup>u</sup> 2:17 1 Ti 1:20    <sup>v</sup> 2:19 Jo 10:14; 1 Ko 8:3; Ais 52:11

<sup>w</sup> 2:22 1 Ti 6:11    <sup>x</sup> 2:23 1 Ti 4:7

Ne Owane Sitewi lo yo seni au siye atuatuwei su, ne ai marepi werese fu arosawite. <sup>25</sup>Sosu a'i pe lu taune tamo meni ape ma'e ai peri te'e tiyatiyei su, ne marepi momotei a'i se lowe ma'e au te'e atuatute. Ne marepi eresene a'i se au te'e atuatuwei su, Owane Sitewi fara'u marepi lowe lo atati ani aweto irowei. Serai lowe Owane Sitewi lo peri wiyeme a'i wanu so'oruweyei. <sup>26</sup>Sosu aiwawe a'i lowe marepi towafi lowe lo amerame a'i heneraiyei. Lowe marepi amerame a'i heneraiyei su, sepei Satan lowe ma'e la'inau se owe ape aine tawesi anirowata. Sepei Satan lowe aniyei ne totesiya. Sosu le lowe ma'e marepi lowe lo tatai aniyei ne totesiya. Le marepi lowe lo tatai aniyei su, lowe yo seni lo umasiyei.

**Nowe ye'ewi su yo seni luwaru henerairowa.**

**3** <sup>1</sup>Peri eite wanu etire. Nowe ye'ewi se etiri luwaru wiyeme a'i henerairowa.<sup>y</sup> <sup>2</sup>Lu taune tomu ne'ese marepi erasi a'i towafi lowe lo, tote wawesiyenamirowa. Lowe ma'aru ne erasi a'i totenamirowa. Iyape towafi lowe lo ei ani arowerowa. Lowe lu taune werese ma'e te'e naruterowa. Lowe ei ani arowerowa. Lowe tai, mai lowe lo peri arisinamirowa. Lowe lu taune ma'e au te'e wisereyerowata. Lowe yo seni towafi lo aseyaro irorowata. <sup>3</sup>Lu taune ma'e marepi erasi a'i tote wawesiyerowata. Lu taune tamo lowe ma'e au luwaruwerowa su, lowe yo seni luwaru a'i lowe lo anite tawesirowa. Lu taune ma'e lowe te'e narurowa. Lowe peri heneruwe luwaru a'i au te'e fiyarinamirowa. Lowe lu taune ma'e au luwaruwerowa. Lowe etiri wisere a'i ai marepi totenamirowa. <sup>4</sup>Lowe te'e areare irorowa. Lowe marepi onota'ano a'i ne. Lowe marepi towafi lowe lo erasi a'i tote wawesiyerowa. Lowe awei lo yo seni erasi a'i toterowa. Ahowa, lowe Owane Sitewi lo marepi toterowata. <sup>5</sup>Lowe yo seni wara'i areareye irorowa. Ahowa, lowe Owane Sitewi lo peri arisirowa. Ne lu apou ape mo me'iyeni ma'e atati arute.<sup>z</sup> <sup>6</sup>Sosu a'i pe wanure! Lu feni ape lowe wesi tamo wiyei su, lowe taune, marepi hawihawi a'i irosiya ape, arearerowa. Marepi lowe lo tatai anirowa. Taune ape yo seni luwaru a'i tomu ne'ese ironamisiya. Sosu marepi lowe lo yo seni luwaru a'i apou ape ma'e tatai anisiya. <sup>7</sup>Taune ape mo etiri werese siye so'oruweyei ne. Ahowa, lowe Owane Sitewi lo peri wiyeme a'i tote tawesi ta'ame. <sup>8</sup>Apou a'i tu naifa lu hesi iyape Janes, sosu Jambres yo seni apou ape iroteye. Lowesi Moses lo peri arisiteye. Serai lu tamo apou ape lowesi peri wiyeme a'i arisinamisiya. Marepi lowesi lo luwaruwe po'uteye. Serai Owane Sitewi lai lowesi ne me'iyeni ma'e atati aruwe.<sup>a</sup> <sup>9</sup>Marepi apou ape lowesi lo erasi a'i henerairowata. Ahowa, marepi meremereye a'i lowesi lo lu taune werese lai marepi lowesi lo siye etirowa. Lu hesi ape, Moses lo yo peri arisiye ape, marepi lowesi lo

<sup>y</sup> 3:1 1 Ti 4:1    <sup>z</sup> 3:5 Mt 7:15,21; Ta 1:16    <sup>a</sup> 3:8 Kis 7:11

aiwawe yahowa'i henerai. Lu taune werese lai marepi meremereye a'i lowe lo siye etiyei.

**Pol Timoti ma'e au te'esiya.**

<sup>10</sup>Ahowa, ne lai lu hesi lo yo seni luwaru a'i umasi ta'ame. Ne peri werese ano wanu so'oruwesiya. Aiwawe ne marepi werese ano siye so'oruwesiya. Sосу aiwawe marepi sitewi ano, marepi tote tawesiyei ano, sосу marepi farere a'i ano ne siye so'oruwesiya. Ane lu taune werese marepi erasi tote wawesiyenamiye. Ne so'oruwesiya. Ane etiri luwaru teriteye su, ane kairefi a'i teiteye. Ne so'oruwesiya. <sup>11</sup>Sosu lu tamo ane ma'e au luwaruweye su, sосу ane fofowe teriteye su, etiri ape mo ne so'oruwesiya. Ane omo Antiok, Aikoniam, sосу Listra saro iroteye su, ane marepi orese a'i teriteyewe, sосу kairefi a'i teinamiye. Ahowa, Meni Owane ano etiri werese luwaru a'i, ane teriteye ape, le ane kairefiye teiyei ne pati ferafereye.<sup>b</sup> <sup>12</sup>Wiyeme! Lu taune tomu ne'ese Krai Jisas lo marepi umasiye ne totesiya. Lu tamo lowe werese ma'e au luwaruweyei.<sup>c</sup> <sup>13</sup>Lu luwaru a'i, sосу lu areareyei a'i, lowe yo seni luwaru a'i lowe lo erasi a'i heneraiyei su, sосу yo seni luwaru pefine a'i henerairowa. Lowe lu taune tamo areareyei, sосу lu tere'e tamo lowe ma'e areareyei. <sup>14</sup>Ahowa! Ne, Timoti, peri ano wanure. Ne etiri werese ne tu wanu so'oruweteye ape, umasite. Ne a'i lai, lu taune apou ape ane mo, ne ma'e au te'e atuatuwe ape, so'oruwesiya. Serai ne etiri werese ape tote anite tawesite. <sup>15</sup>Ne eimane osu iroteye su, ne Owane Sitewi lo peri werese ape wanu so'oruweye. Owane Sitewi lo peri ape fara'u ne ma'e marepi wisere a'i auwei. Serai ne Krai Jisas ne tote tawesiyei ape, ne tote tawesiyei su, Owane Sitewi lai ne ma'e marepi hepene he'i a'i aurowa. <sup>16</sup>Owane Sitewi lo peri werese Owane Sitewi lai ahi lo se au te'e areiyeye. Sосу ne fara'u Owane Sitewi lo peri se lu taune ma'e au te'e atuatuwe. Ne Owane Sitewi lo peri ape se lu taune lo yo seni luwaru a'i au te'e fareraiyete. Ne lu taune ma'e peri lowe lo au fareraiyeyei. Sосу aiwawe ne fara'u lu taune werese ma'e yo seni wara'i a'i au atuatuwei.<sup>d</sup> <sup>17</sup>Serai meni ta Owane Sitewi lo peri werese wanu umasinamiyei su, le Owane Sitewi lo meni heneraiyei. Sосу Owane Sitewi lo meni ape fara'u wiyawi wisere werese a'i ta'anerowa.

**Ne Owane Sitewi lo peri au te'e fiyarite.**

**4** <sup>1</sup>Sosu a'i pe Krai Jisas si tame aiyerowa, le lu taune werese a'i au noweinowerowa su, le a'i lai lu taune werese hepene norohu irosiya ape, au hese ereiyei. Sосу aiwawe a'i le lu taune tu temeniyeye ape, au hese ereirowa. Owane Sitewi, Krai Jisas aiwawe a'i lowesi lo

<sup>b</sup> 3:11 Ap 13:14-52; Ap 14:5,8-20    <sup>c</sup> 3:12 Mt 16:24; Jo 15:20; Ap 14:22    <sup>d</sup> 3:16 Ro 15:4

nihe se, ane ne ma'e peri kairefi a'i au te'esiya. <sup>2</sup>Ne Owane Sitewi lo peri au te'e fiyarite. Lu taune tamo Owane Sitewi lo peri wanu umasiyei ne totesiya su, ne lowe ma'e fara'u au te'ere. Sosu aiwawe lu taune Owane Sitewi lo peri wanu umasi ta'ame su, ne apou a'i lowe ma'e au te'ere. Ne lu taune werese lo peri au te'e fareraiyere. Aiwawe ne lowe lo yo seni luwaru a'i peri morose te'ere. Sosu lu taune werese ma'e marepi wisere a'i totere. Ne lu taune ma'e au te'e fiyariyei su, ne marepi lowe lo farere a'i au irote. Sosu ne Owane Sitewi lo peri lowe ma'e au te'e atuatu noweinoweite. <sup>3</sup>Wanure! Nowe ta su lu taune tomu ne'ese Owane Sitewi lo peri wiyeme a'i wanu umasi ta'ame. Ahowa, lowe marepi towafi lowe lo umasirowa. Lowe atuatu siye lu tomu ne'ese ei ta'uweraiyewe, sosu lowe lai marepi towafi lowe lo wanu umasirowa.<sup>e</sup> <sup>4</sup>Ahowa, lowe Owane Sitewi lo peri me'iyeni ma'e atati aruwe. Sosu lowe ya'ariyei peri yahowa'i umasinamiyei. <sup>5</sup>Ahowa ne mi mi werese etiri werese se marepi tote eti peratite. Etiri luwaru a'i ne ma'e heneraiyei su, ne kairefi a'i teite. Ne lu taune werese ma'e Owane Sitewi lo peri au te'e fiyarite. Owane Sitewi lo wiyawi werese ne ta'aneye ape, ne au noweinoweite. <sup>6</sup>Nowe ano henerai. Nowe i'ero a'i lu tamo ane aine tera'eyei ne totesiya. Apou a'i lowe ane aine tera'eyei su, ane lai tahe pa'are ano Owane Sitewi ma'e au heseyei. Ane atahe temeniyeye ne ataheyewa.<sup>f</sup> <sup>7</sup>Ane Owane Sitewi lo wiyawi ta'ane tepa'asiye. Ane neritase a'i terite ta'ame. Apou a'i ane itero awera'iyenatinamiye. Ane Owane Sitewi lo marepi werese tote tawesiyeye.<sup>g</sup> <sup>8</sup>Serai ane temeniyeyei su, Owane Sitewi lai ane ma'e marepi hepene norohu neri a'i aurowa. Marepi hepene norohu he'i a'i apou a'i yo seni wara'i a'i auwei. Meni Owane Pefine a'i au heseyei siye meni nomo lo, le lu taune werese marepi wara'i a'i au hese ereirowa. Serai nowe ye'ewi se Owane Sitewi lai ane ma'e yo seni wara'i a'i aurowa.<sup>h</sup>

**Pol lai Timoti ma'e eiye, "Ne witane a'i fa aiye."**

<sup>9</sup>Ne ane ma'e witane a'i aiya. <sup>10</sup>Meni ta iyape Demas, le awei lo etiri werese ape mo ne marepi erasi toteteye. Sosu le ane ne me'iyeni ma'e atati arunatiyewe, omo Tesalonaika ma'e fi. Meni tere'e iyape Kresens omo pani Galesia ma'e fi. Sosu Taitus pani Dalmesia ma'e fi. <sup>11</sup>Meni Luk ta'i a'i ane mase irosiya. Ne meni Mak hene aiseri, sosu fenese ane ma'e aiya. Mak meni wisere a'i tene! Tu le ane Owane Sitewi lo wiyawi ano au pati ta'aneteye.<sup>i</sup> <sup>12</sup>Ane meni Tikikus omo Efesus ma'e eimawesawi. <sup>13</sup>Fenese aiyeiyei su, ne ipari tahe erasi pite a'i ano aita. Ane ipari tahe ano ape omo Troas arunati. Meni Karpus lo wesi sahe anitesiya. Sosu aiwawe fenese

<sup>e</sup> 4:3 1 Ti 4:1    <sup>f</sup> 4:6 Fl 2:17    <sup>g</sup> 4:7 1 Ti 6:12    <sup>h</sup> 4:8 1 Ko 9:24-25    <sup>i</sup> 4:11 2 Ko 8:23; Ap 15:37-39; Kl 4:14



aiyeyei su, fenesi one towe werese ano ne aita. Ne witu hamau, ane lese tepa'asiye ape, aita.<sup>j</sup>

<sup>14</sup>Wanure! Meni ta iyape Aleksander, wiyawi lo kapa ta'anesiya. Le ane ma'e erasi a'i au luwaruweteye. Serai Meni Owane Pefine a'i nomo lo le ma'e etiri luwaru a'i itiya'u au irorowa.<sup>k</sup> <sup>15</sup>Weiyai! Ne meni ape siye etire! Le Owane Sitewi lo peri, ne nomo au te'e fiyariye ape, ai marepi erasi a'i totesiya.

<sup>16</sup>Sosu a'i pe lu tamo tu ane ma'e etiye su, lu taune werese ane au pati feraferei ta'ame. Lu taune werese ane arunati iteroti. Ane lowe ma'e marepi luwaru a'i tote ta'ame. Sosu Owane Sitewi aiwawe lowe ma'e marepi luwaru a'i tote ta'ame. <sup>17</sup>Ahowa! Meni Owane nomo lo ane mase teiteyewe, sosu marepi ano au kairefiyeye. Owane Sitewi lai ane ma'e au ani pati ferafereiye. Serai ane fara'u Owane Sitewi lo peri lu tewi tere'e ma'e au te'e fiyari areiyeteye. <sup>18</sup>Sosu lu taune etiri luwaru a'i ane ma'e au luwaruwayei su, Meni Owane Pefine a'i nomo lo ane ma'e au pati ferafereiyei. Sosu le ane omo wara'i a'i lo ma'e hene ani wirowa. Sosu ane mi mi pasi pasi le mase irotorowa. Serai ane mi mi weriyei iyape lo ei ani arowenamisiya. Wiyeme a'i.

#### **Peri pihatu ane lu taune tamo eritesiya.**

<sup>19</sup>Sosu ane peri ye'ewi au te'esiya. Ne nohuweripi Akwila, tani lo Prisila lowesi ma'e eritere. Sosu lu taune werese Onesiforus lo wesi sahe iroteye ape, ne lowe ma'e eritere.<sup>l</sup> <sup>20</sup>Meni Erastus omo Korin sahe irosiya. Sosu meni Trofimus u erasi se ane omo Miletus arunati.<sup>m</sup> <sup>21</sup>Ne witane a'i ane ma'e aiya. Nowe naretei a'i ataheyeraiwai. Sosu meni Yubulus, sosu meni Pudens, sosu Linus aiwawe Klodia, lowe ne ma'e eritesawisiya. Sosu aiwawe lu taune werese, Kraisi Jisas lo marepi umasiye ape, ne ma'e aiwawe eritesawisiya.

<sup>22</sup>Sosu a'i pe Meni Owane Pefine a'i nomo lo hepene no aiwawe a'i iroteyei. Owane Sitewi lo marepi ferafereiye ne mase ironamiteyei. One towe eite tepa'asiye. Papera.

<sup>j</sup> 4:13 Ap 20:6    <sup>k</sup> 4:14 1 Ti 1:20; Sng 62:12; Ro 2:6    <sup>l</sup> 4:19 Ap 18:2; 2 Ti 1:16-17

<sup>m</sup> 4:20 Ap 19:22; 20:4; Ro 16:23